



中國大事記

二月 十六日

●黔軍占湖南麻陽……黔軍自入湘境後。因湘省兵力薄弱。連戰皆捷。於本日攻取麻陽。聞沅州亦已被佔。

同 十八日

●湖北軍隊暴動……鄂軍第一師馬隊。駐紮湖北城外南湖。受黨人運動。於本日晚間十時暴動。攻撲附近砲隊。並有人在城內各處縱火。經該省官吏預為防備。即遣軍前往攻擊。並將火救熄。變軍因勢力不敵。紛紛潰散。

同 二十日

●外交部奏准設英屬北波羅洲總領事……英屬北波羅洲地方。介乎香港新加坡斐律賓並和屬各埠之間。地當衝要。商務繁盛。華僑赴該埠操農工商各業者。已達二萬餘人。前經外交部與英國駐英公使提議。擬在該地設置領事。請其轉達政府。旋准英國公使復稱同意。由部奏請特設北波羅洲總領事一員。奉批照准。

東方雜誌 第十三卷 第四號 中國大事記

●黨人謀在長沙起事……湖南自被黔兵侵入境內。省城防守甚嚴。本日夜間。長沙城內有黨人數十人。懷挾手鎗炸彈。向將軍署及警署擲擊。並在各處縱火。希圖起事。經軍警協力圍捕。拘獲黨人十餘人。

同 二十一日

●特封熊祥生為二等男李炳之吳佩孚為三等男

●申令各省嚴禁經徵人員婪索……申令。前據報告。歸綏地方官吏。收捐苛碎。當經飭部派員密查。茲據覆稱。該處捐稅既重。積弊至深。而尤以各處車捐與細物加捐。最遭怨望等語。

綏遠地處邊瘠。豈容此等劣員。不恤民生。藉詞巧取。業已另派大員。馳往查辦。並飭財政部轉行該處財政分廳。體察地方情形。但涉病民者。概予免捐。以示體恤而祛擾累。京外各省。難保無此等情弊。着各該省監督長官暨財政廳長。嚴飭各項經徵人員。顧念時艱。權衡物力。所收捐稅。務宜恪守定章。倘有巧立名目。任意婪索者。一經發覺。立予懲處。決不稍寬。



30804

將此通令知之。此令。

同 二十二日

●內務部通飭各省保存古物……內務部為保存古物起見。特條列事項。通飭各省調查。設法保存。

同 二十三日

●申令規畫水利……申令。前特派徐世光督辦近畿河道。譚學衡督辦西江工程。疎導淮河。亦由全國水利局擬有辦法。除近畿河道業經興工外。其餘各處工程。雖因籌資困難。借款展期。未克速辦。而持以毅力。無論如何艱鉅。為之不已。終底於成。着譚學衡會同張鳴岐。將該省應辦工程。悉心經理。督飭進行。其導淮及籌濬洞庭。均責成全國水利局。暨各該管部。會商各該省巡按使。次第規畫。先行遴員調查測繪。一面籌集款項。依次興工。務收實效。總期數年以後。各省要工。一律完竣。以興農業而闢利源。此令。

●海軍部奏准修正海軍各艦隊司令條例改為海軍艦隊司令處編制令……海軍總司令業經裁撤。所有各艦隊司令。改歸海軍部直轄。前經公布之艦隊司令條例及海軍練習艦隊司令暫行條例。或現時不能適用。或繁簡未盡合宜。海軍部特提前修正。改為海軍艦隊司令處編制令。奏請公布。奉批照准。(令見法令門)

同 二十四日

●擴充京師師範學校……申令。前經明令各省將師範學校整頓擴充。以為國民教育之先導。顧念各省學務。久形減縮。或因

財力支絀。班次不易增加。或因辦理失宜。成績未能優美。遂至根本計畫。迄難一致進行。須知今日師範之優劣。即將來國民教育優劣所關。教授既貴精良。設置尤須完備。自非先從中央倡率。不足以宏造就而樹楷模。着教育部將京師師範學校。量加擴充。調取各省學生來京肄業。各該省學生名額。暫定為大省二十名。中省十六名。小省十二名。由各該巡按使選擇優等生徒。分期咨送。所有籌備設置一切辦法。即着該部悉心妥擬。奏請施行。此令。

同 二十七日

●令各省平治道路……申令。全國道路。亟應統籌熟計。協力興修。近將京兆地方。定為自治模範區域。道路本在籌辦之例。着京兆尹詳查該管地方應行修治之路。分別國道縣道兩項。悉心規畫。樹之風聲。其鄉村各路。亦即責成區董。量為整理。此外各省區道路。均歸該地方長官督飭所屬道縣。分別緩急。次第籌辦。吾國舊俗。凡一鄉一縣之與梁路徑。多由人民公共建立。視為慈善事業。應由地方官提倡公德。善為勸導。惟不得稍事抑勒。如有樂輸鉅款者。當特予優獎。用資觀感。着內務部迅即擬訂修治道路條例。奏明辦理。此令。

同 二十八日

●京師設立高等警官學校……本日申令。警察為內務行政最要機關。造就專才。實為興辦警政之要務。前據內務部請辦地方警察傳習所。調選各省警察官吏入學。復議於各省設立全省警

務處。整飭警政。統一事權。固屬切要之圖。而根本計畫。非廣育高等警察人才。不足為全國警察之模範。應於京師設立高等警官學校。精選英才。施以相當之教育。學成分往各省。轉相傳習。庶幾專才日出。警政日修。翰謀保居。功用至大。一切辦法。着內務部迅即妥議奏明辦理。其該部現在整理警察事宜。仍飭照舊進行。此令。

●定五月一日為立法院議員召集期……申令。立法院組織法。常年會期。係自每年九月一日起至年終止。惟立法院之成立開會。究與常年會期不同。當茲厲行立憲政治之時。自應提前召集。慰我民望。着定於本年五月一日。為立法院議員召集之期。所有一應籌備事宜。並飭內務部暨籌備立法院事務局。遵照法令。妥速辦理。此令。

30805
●告令以國民會議覆選當選人為立法院覆選當選人……令曰。前以上年以來。業以厲行立憲政治。掬誠告我國民。而立憲國家。除司法機關應依法律編制外。固貴有擔負責任之行政機關。以舉國利民福之大政。尤貴有總集民意之立法機關。以宏久安長治之遠謀。自約法以國家立法機關。屬之人民選舉組織之立法院。故立法院組織法及立法院議員選舉法公布後。即設立籌備立法院事務局。依法籌備。以冀立法機關。早日成立。嗣約法會議復議決國民會議組織法。依法公布施行。國民會議之組織。除立法行政司法三機關互選之六十名議員而外。其餘議員之名額。議員選出之區劃。以及選舉之資格。選舉之方法及程

序。無一不與立法院議員選舉相同。以兩項機關之選舉行政。事本一貫。故就籌備立法院事務局中。依法附設辦理國民會議事務局。以期兼營並進。免涉紛歧。自該兩局成立以來。迭飭迅將選舉以前之調製選舉名冊審查選舉資格等事項。會同各該監督辦理完備。就籌備先後次第而論。本應先行立法院議員選舉。前因制定憲法。已由參政院推舉起草。則關於決定憲法之國民會議。不能不先期召集。故又以最先籌備之立法院選舉。提前選舉國民會議議員。遂於上年十月以後。舉行國民會議議員選舉。除中央特別選舉會及蒙藏青海聯合選舉之單選尚未舉行外。其各省各特別行政區域之覆選當選人。均據辦理國民會議事務局籌備立法院事務局先後彙報。業於上年十二月以前一律依法選出在案。惟憲政施行。既難稍涉延緩。而憲法起草。亦難草率圖成。誠以根本大法。關係國家之治忽安危者。非常重大。自應由起草各員。從長討論。未可急切程功。過事催促。轉生窒礙。然必待至憲法草案之提出。經由國民會議之決定。始於公布憲法後。召集立法機關。殊失厲行憲政尊重民意之本旨。查施行約法時代。本應有民選議員組織之立法院。際茲與民更始之秋。知人民關懷政治之心益切。尤應將約法上之立法院及早成立。俾得相與維持。共謀治理。上年十二月。曾經明令宣布。准於本年內成立立法機關。彼時即以民意機關。關係國本。實施憲政。萬難緩圖。現在舉國人民望治之心。較前尤亟。國家大計。諸待圖維。立法院之成立。在約法雖無一定期

30806 限。然爲尊重民意。力求政治刷新起見。此時實緩無可緩。查立法院議員選舉方法。推立法者本意。以慎重將事之故。程序至爲繁難。雖設局籌備。責有專司。究之文電往返。動稽歲月。且地方財力有限。若於甫經舉行初選覆選之後。遽令仍照通行程序辦理。終恐多方窒礙。猝難剋日觀成。斟酌權宜。惟有卽以各省各特別行政區域上年提前舉行之國民會議覆選。作爲立法院議員覆選。其已經舉出之覆選當選人暨候補當選人。卽作爲立法院議員選舉之覆選當選人暨候補當選人。其尙未舉行之中央特別選舉會及蒙藏青海聯合選舉會之單選。卽提前辦理立法院議員單選。飭由籌備立法院事務局從速趕辦。如此辦理。既於約法之精神不背。尤與選舉之程序相符。一轉移間。而民意機關之立法院。可以剋期成立。則國家厲行憲政之苦心。卽所以慰我國民想望治平之公意。且以國民會議覆選當選人爲立法院覆選當選人。雖事屬變通辦理。而議員名額相同。選舉程序相同。既可免法令之牴觸。兼可促憲政之實行。至制定憲法。事關國本。自應仍俟起草各員從容討論。務將國家根本組織。如何適合國情民俗。并如何鞏固國基振興國勢之處。折中至當。分別依照制定程序進行。其國民會議議員選舉。一面飭由辦理國民會議事務局依法繼續辦理。所有國民會議議員選舉舉出之覆選當選人。卽爲立法院之覆選當選人。是否可行。應依約法諮詢代立法院迅速議覆等因。諮詢代立法院查照議決去後。茲據代立法院覆稱。本月二十六日開會討論。僉以爲立

立法院議員選舉。與國民會議議員選舉。兩項辦法相同。當此國民望治孔殷。政府力行憲政之際。亟盼立法院早日成立。自應卽以國民會議議員選舉選出之覆選當選人作爲立法院之覆選當選人。其中央特別選舉及蒙藏青海選舉。亦卽提前辦理立法院議員選舉。如此辦理。於法律毫無所背。惟查立法院組織法。每年會期自九月一日起至年終止。今值厲行憲政之時。尤應迅速提前召集。俾得早日成立。以慰民望而固國基。當經表決全體贊成等語。除將立法院議員提前召集日期另令公布外。特此布告。咸使聞知。此令。

同 二十九日

●參政院代立法院閉會……參政院代立法院職權。上年分常年會開會。曾經宣告延長會期兩個月。現在已屆期滿。本日宣告閉會。

●改四川陸軍第一師爲陸軍第十五師……四川陸軍第一師改爲陸軍第十五師。並將四川第一混成旅歸併該師。其混成旅部裁撤。

三月 一日

●派肅政使王瑚等分往各省考察經徵情形……本日申令。派肅政使王瑚夏壽康蔡寶善徐沅。分往各省。將經徵情形。詳細考察。如有浮收巧取苛罰等弊。立卽據實陳奏。以憑懲辦。

●中日吉長鐵路條約簽字……吉長鐵路條約。前由交通部與日本公使訂定。現經兩國特派員修正。將草案呈報兩國政府核准。

於本日正式簽字。

同日

●公布外交官領事官官制……官制見法令門。

●公布外交官領事官官等官俸令……令見法令門。

同日

●特派陸榮廷爲貴州宣撫使……同日申令。滇變以來。廣西耀武

上將軍陸榮廷。義憤異常。屢請率師致討。當以桂疆重要。未

許其行。近據一再奏請。情詞懇摯。該上將軍公忠體國。不辭

勞瘁。仁心壯志。洵屬難能。已勉如所請。特派爲貴州宣撫使。

該上將軍率衆遠征。入黔以後。務當宣布德意。將剿撫事宜。

悉心籌畫。用副國家除暴安良之至意。此令。

●特任陳炳焜兼護督理廣西軍務

●公布揀屬敍官令……令見法令門。

●川軍克復敘州……威武將軍陳宦電奏。旅長馮玉祥等。於本

月一日奪據觀斗山吹火山等要隘。二日清晨。將江左要隘完全

奪領。隨攻佔江岸真武山華平山等要隘。至三日上午。又據白

塔寺一帶高山。俯臨敘城。當將敘州克復。

●特封馮玉祥爲三等男

●廣東黨人屢圖起事……廣東近日屢有黨人謀在各地起事。本

日黨人數十人。乘往來廣州澳門間之永固輪。於經過黃浦海面

時。迫船上水手駛近泊在該處之肇和軍艦。拋擲炸彈。同時復

有多人。在陸地圖攻長洲砲台。當時均被驅散。並捕獲多人。

九日。又有黨人在順德縣黃麻涌攻撲清鄉行營。旋即占據。當
謀築壘固守。經粵軍分水陸夾攻。黨人力不能支。始各潰散。

同日

●司法部通飭各廳寬遇女犯……司法部以婦女有主持家務養育

子女之責。偶有犯法。不宜概予監禁。特通飭各廳廳。嗣後婦

女犯罪。如果輕微。無妨從寬准其保釋。其在五年有期徒刑以

下者。並准予改易罰金。

同日

●粵軍攻克剝隘……雲南查辦使龍觀光電奏。據第一路司令李

文富電稱。三月一日晚八時。分兵向雲南剝隘進攻。戰至二日

黎明。將粵西砲台奪取。營長王春山。率隊繞道向剝隘後山力

攻。午後直據山頂。俯攻剝隘。連長李正邦。奪取百萊砲台。

立將剝隘克復。

●援川軍隊克復納溪……將軍陳宦曹錕第二路司令張敬堯等。

先後電稱。滇軍精銳萬餘人。勾結四川劉存厚一旅。先據敘州。

繼攻瀘縣。上月經旅長吳佩孚率軍抵禦。酣戰數日。寇遂敗竄

納溪。築壘固守。並期再舉攻瀘。適張敬堯率所部六千人趕到

瀘防。即向納溪進攻。本月初七日。先將各要隘山頭悉行占領。

納溪城鄉。遂即一律完全克復。

同日

●特派熊希齡爲湘西鎮守使

●公布洪憲元年六釐內國公債條例……參政院議決同意。條例

30808 見法令門。

●公布文官甄用令施行細則……細則見法令門。

同 十一日

●特派曾鑑爲川南宣慰使

●公布頒爵條例……條例見法令門。

同 十二日

●公布傳染病豫防條例……條例見法令門。

同 十三日

●援湘軍隊克復麻陽……代理第一路司令周文炳電奏。本月初三日。連克高林岩門等要隘。在心仁溪激戰五小時。又在江口市東激戰。隨進至麻城地方。渡河猛攻。初六日進攻麻城。當將麻陽克復。

●援川軍隊克復江安南溪……將軍陳宦曹錕第二路司令張敬堯先後電奏。團長劉湘。率隊迭在沅堵南丹四方山白沙場等處激戰。於本月初八日。克復江安。當於九日進兵追剿。至大渡口觀音閣等處截擊迭勝。乘勢將南溪克復。

同 十四日

●公布立法院議員單選舉日期令……令見法令門。

同 十五日

●北京開全國專門學校成績展覽會……教育部爲使各專門學校互相觀摩起見。特舉行全國學校成績展覽會。本日在北京開會。

●陸榮廷陳炳焜等宣告廣西贊助共和……前廣西將軍貴州宣撫

使陸榮廷。桂林鎮守使兼護督理廣西軍務陳炳焜。巡按使王祖同。及梁啓超等。於十三日電致北京。請元首即日辭職。當經覆電拒絕。遂於本日通電各省。宣告廣西與雲貴聯合。維持共和。

同 十八日

●公布立法院秘書廳官制……官制見法令門。

●公布立法院警衛處官制……官制見法令門。

同 二十二日

●申令撤銷承認帝位案……申令。民國肇建。變故紛乘。薄德如予。躬膺艱鉅。憂國之士。悚於禍至之無日。多主恢復帝制。以絕爭端而策久安。癸丑以來。言不絕耳。予屢加呵斥。至爲嚴峻。自上年時異勢殊。幾不可遏。僉謂中國國體。非實行君主立憲。決不足以圖存。倘有墨葡之爭。必爲越緬之續。遂有多數人主張恢復帝制。言之成理。將吏士庶。同此個忱。文電紛陳。迫切呼籲。予以原有之地位。應有維持國體之責。一再宣言。人之不諒。嗣經代行立法院議定。由國民代表大會解決國體。各省區國民代表。一致贊成君主立憲。並合詞推戴。中國主權。本於國民全體。既經國民代表大會全體表決。予更無討論之餘地。然終以驟躋大位。背棄誓詞。道德信義。無以自解。掬誠辭讓。以表素懷。乃該院堅謂元首誓詞。根於地位。當隨民意爲從違。責備彌周。已至無可諉避。始以籌備爲詞。藉塞衆望。並未實行。及滇黔變故。明令決計從緩。凡勸進之文。均不許

呈遞。旋即提前召集立法院。以期早日開會。徵求意見。以俟轉圜。予憂慮餘生。無心問世。遜跡洄上。理亂不知。辛亥事起。謬為衆論所推。勉出維持。力支危局。但知救國。不知其他。中國數千年來。史冊所載。帝王子孫之禍。歷歷可徵。予獨何心。貪戀高位。迺國民代表。既不諒其辭讓之誠。而一部分之人心。又疑為權利思想。性情隔閡。釀為厲階。誠不足以感人。明不足以燭物。予實不德。於人何尤。苦我生靈。勞我將士。以致衆情惶惑。商業凋零。撫衷內省。良用矍然。屈己從人。予何惜焉。代行立法院轉陳推戴事件。予仍認為不合事宜。著將上年十二月十一日承認帝位之案。即行撤銷。由政事堂將各省區推戴書。一律發還參政院代行立法院。轉發銷燬。所有籌備事宜。立即停止。庶希古人罪己之誠。以治上天好生之德。洗心滌慮。息事寧人。蓋在主張帝制者。本圖鞏固國基。然愛國非其道。轉足以害國。其反對帝制者。亦為發抒政見。然斷不至矯枉過正。危及國家。務各激發天良。捐除意見。同心協力。共濟時艱。使我神州華裔。免同室操戈之禍。

化乖戾為祥和。總之萬方有罪。在予一人。今承認之案。業已撤銷。如有擾亂地方。自貽口實。則禍福皆由自召。本大總統本有統治全國之責。亦不能坐視淪胥而不顧也。方今閭閻困苦。綱紀凌夷。吏治不修。真才未進。言念及此。中夜以興。長此因循。將何以國。嗣後文武百官。務當痛除積習。黽勉圖功。凡應與應革諸大端。各盡職守。實力進行。毋託空言。毋存私見。予惟以綜覈名實。信賞必罰。為制治之大綱。我將吏軍民。尙其共體茲意。此令。

●召集代行立法院臨時會……申令召集代行立法院臨時會。並宣告於本月二十三日開會。

●特任徐世昌為國務卿……准陸徵祥開去兼職。專任外交總長。

同 二十三日

●特任段祺瑞為參謀總長……准馮國璋開去兼職。

●廢止洪憲年號……告令。前據大典籌備處長奏請建元。現在承認帝位一案。業已撤銷。籌備亦經停辦。所有洪憲年號。應即廢止。仍以本年為中華民國五年。此令。

